

Dithero tsa Tirelano mo Kutlwanong

Thero ka moletlo wa go gopola ntšhwafatso ya kereke, e le ka 30. 10. 2011

53/2011

Mo leineng la Modimo o e leng Rara le Morwa le Mowa o o Boitshepo!

1. Sefela sa 186 - 172/179
2. **Thapelo:** Modimo, Mong wa tsotlhe, re go leboga jang ka o re bulela pelo ya gago ka boammaruri jwa thuto ya efangele. Re thuse gore mo sebakeng sa rona, re itshokele joko ya bontšhwafatso gonne e ise mewa e e lapileng kwa go Morwao Jesu Keresete. Amen.
3. Epistolo ka fa thulaganyong ya 2 e kwadilwe mo go Baroma 3:21-28;
Efangele ka fa thulaganyong ya 1 e kwadilwe mo go Matheo 5:2-12.
4. A go ipolelwe tumelo ya bokeresete!
5. Sefela sa 183 - 169/ -
6. Thapelo ya mmadi wa thero.
7. **Efangele** ka fa thulaganyong ya 3 e ntšhwa e kwadilwe mo go Matheo 10:26b-33, e re: "Ka moo he, se ba boifeng; gonne ga go sepe se se bipilweng, se se se kitlang se senolwa, le fa e le se se fitlhegileng, se se se kitlang se itsiwe. Se ke se lo bolelelang mo lefifing, lo se bue mo leseding; le se lo se sebelwang, lo se utlwatse lo le mo godimo ga matlo. Le gona, lo se ka lwa boifa ba ba bolayang mmele, mme ba sa nonofa go bolaya mowa; mme bogolo lo boife ene yo o nonofileng go senya mowa le mmele mo moleteng wa molelo. A dirobele tse pedi ga di rekisiwe ka halfsent? Mme ga go sepe sa tsona se se welang fa fatshe kwa ntle ga go rata ga Rraeno. Mme le dithiri tsa ditlhogo tsa lona di badilwe tsotlhe. Ka moo, se boifeng; gonne lo gaisa dirobele di le dintsi. Jaanong mongwe le mongwe yo o tla impolelang fa pele ga batho, le nna ke tla mo ipolela fa pele ga Rre yo o kwa magodimong. Mme yo o tla intatolang fa pele ga batho, le nna ke tla mo itatola fa pele ga Rre yo o kwa magodimong." Amen.

8. Thero: SETLHOGO: "BONTŠHWAFATSO JWA KEREKE KE SEFAPAANO"

Matseno: Barategi Moreneng, re leboga Modimo o o re boloketseng thuto, thero le boipolelo jo bo itshekileng jwa Lefoko la One. Re bile re leboga bakeresete ba ba sa kgaotseng go rapela ka disontaga tsotlhe gore Modimo o re romele bareri le baruti ba ba ikanyegang mo thutong le mo bophelong. Bogolo re leboga Modimo o o tla tsweleng go boloka Kereke, Lefoko le disakamente tsa one le fa bakeresete ba lebala go o kopa. Kajeno re keteka moletlo o o pegileng kereke ya Modimo kwa godimo ga thaba, gore e heme moa wa kgololesego. Thaba e e nang le lebone le le panyapanyang le le supang fa

molelwane wa boammaruri le tshokamo o leng teng. A re tsenyeng mo moletlong ono ka go ikgakolola gore:

I. Bontšhwafatso ke sefapaano sa katlholo: Ditsala Moreneng, mo ditemaneng 26-27, Morena o bua ka moa o o tsitsipetseng a supa go barutwa ba gagwe gore jaaka a ba roma jaana, nako ya kgaoganno, nako ya go upolola, nako ya go khurumolola, nako ya go fenosa e gorogile! Tsotlhe di tshwanetse go tswela leseding. Diipato tsotlhe tsa Bafarasi le baitse-molao di tshwanetse go supiwa gore di eme mo godimo ga eng. Moše, monna wa Modimo le baporofeti ba ba neng ba iphitlha ka bone, ba tshwanetse go supiwa gore Bajuta ga ba a ka ba ba tlhaloganya. O buile nabo ka kgakalo a re, “*Go latlhega lona! (Baitse-molao) gonne lo aga matlapa a diphuphu tsa baporofeti, etswe borraeno ba ba bolaile*” (Luka 11:47). Ka thomo ya barutwa, go bonala gore tota le lesire la ga Moše le tshwanetse go tloshiwa e le ruri, gore botlhe ba lemoge le go dumela gore menwana ya baporofeti botlhe, dikgosi le baengele, e ne supa ene yo o emeng fa go bone, e seng yo mongwe! Bontšhwafatso bo re gopotsa gore kereke mo nakong ya rona, ga e tshwanela go dumelela bosula jaaka Migale a ne a robatsa setshwantsho sa modimo wa ntlo mo bolaong jwa ga Dafita (1 Sm 19:13). Rona rotlhe, bagaetsho, re patelesega ke go ikokobeletsa sefapaano se sa katlholo ka go ema mo leseding la thuto, thero le go utlwa Lefoko sešwa. Sefapaano seno se a re kgola gore Keresete “o tsile kwa ga gagwe” mme re mo tshole mmogo le tse a tsileng natso, e bong Mowa, metsi le madi. Ka mafoko ano o athola dipelo le maikutlo jaaka a dirile ka Bafarisai le Baitse-molao. O obola letlalo la maaka gore boammaruri jo bo boruma, jo bo fodisang, jo bo otlang, bo goroge mo meweng e e lwalang, e e oleng. Seo ke efangele. Ditsala re tla dirang mo nakong eno? A re tla gana go atholwa ke Morena ka Lefoko? Se se botoka ke eng? Go sala mo lefifing le maakeng a batho a a bolayang le go loa go feta? Gongwe a re tla etsa Dafita yo o neng a re, “A bogolo re wele mo diatleng tsa Morena; gonne boutlwelo-botlhoko jwa gagwe bo bogolo; a ke se wele mo diatleng tsa batho”. Katlholo ya Modimo ya go kgaoganya ba one le lefifi, ga se ntho fela, mme e bile ke kalafi. Ka moo a re itshokeleng katlholo e.

II. Bontšhwafatso ke sefapaano sa kotsi. Ditemana 28-30, di bua sentle gore go emela boammaruri ga go kitla go nna botlhofo. Ka re bone ke ene Morena gore o ne a supiwa a na le modemone; a nyadiwa ka a tsenye mo lapeng la baleofi a ja nabo. Mme molaetsa wa gagwe mo go bone o ne o utlwala gore, “Modimo o ba utlwetse botlhoko, e bile seo ke tshupo ya molao le baporofeti”. Ka gale o ne a bua ka gore, ‘go kwadilwe jang mo molaong, o buisa jang?’ O ne a gatelela gore thuto ya gagwe ga se sešwa, se se okeditsweng ke megopolo ya batho. Nnya! O supile gore o tswelletsa puo e le nngwe fela ya molao le baporofeti. Moapostolo Paulo le ene o ne a neelwa losong ka ntlha ya go emela thuto ya dikwalo. Kajeno ditsala, re tla kgapelwa kwa thoko fa re ema ka gore dikwalo ke tsone tshenolo le puo ya Modimo mo phuthegong. E bile tlhaloso ya tsone e bonala sentle mo dikwalong tsa maipoello a kereke ya Luthere. Re tla tshegwa mo go botlhoko! Paulo a re, “*gonne re diregile tshameko e e lejwang*

(theatron) ke lobopo lotlhe, e bong baengele le batho” (1 Bakor.4:9). Kajeno ditumelo tsa dikereke tse di tlhakanyang setso le bokeresete, di tshwana le leru le lentsho le le tlang ka lobelo lo lo boitshegang, le le tla aparelang kereke ya bokeresete. Bonang gore ZCC, Shembe le Modise di ata jang ne! Morena Jesu o kile a bua lefoko a re, *“Se boife letsomanenyana; gonne go natefetse Rraeno go lo naya puso”* (Luka 12:32). Ke sefapaano se se kotsi le fa re sa bolawe gore go tshologe madi, mme di re belaedisa se re emeng mo go sone. Rona re bona re le ba bannye fela, mme re tshwanetse go tswelela ka thomo ya rona ya bontšhwafatso gore le fa lefatshe le sa tlhaloganye, re *“tshwanetse go dira thato ya yo o re romileng.”* Re se boife dibopiwa gonne Mmopi o ntlheng ya rona mo botshelong le mo losong. Tsholofetso e kgolo ya gore re botlhokwa, re tlhwatlhwa-kgolo mo matlhong a Modimo, e bile o re itse rotlhe, mo gotlhe. Ka moo Lutere a o ne a ikgomotsa a re, *“Ba ba re amogang tse re di tshotseng di tla ba thusa eng, ka e se ba ba kgonang go re amoga PUSO”*.

III. Bontšhwafatso ke sefapaano sa boipolelo: Barategi, go ipolela go raya go emela se o se dumelang, o se ruta. Ga go botlhofo. Yo o ipolelang boammaaruri, o iphitlhela a setse a le esi, ka nako nngwe a felelwe ke mafoko, a didimale fela. Keresete o buile gore, ‘lo tla isiwa fa pele ga balaodi le dikgosi ka ntlha ya me; lo tla tlhoiwa ke batho ka ntlha ya me’ e bile lo tla bolawa, fela se boifeng! Go itatola Morena ke se se dirafetseng gareng ga barutwa ba gagwe, se tsweletse le kajeno. Ka nako eo ba ne ba tshwanela go supa gore Jesu ke Mesia, gompiano rona re tshwanetse go ipolela godimo ga foo gore molao wa Modimo ga wa fetolwa ke melao ya tumelelo ya lefatshe la rona, gore efangele ya ditsholofetso tse e seng tsa Dikwalo jaaka go ruta dikereke tse di ubugang mo metseng ya rona ga se Efangele e e nang le molaetsa wa bontšhwafatso. Tota ke molao o o bidiwang efangele, mme ga e pholose, e tsenya poifo le tlhotlheletso ya ditiro mo digakoloding tsa batho. Rotlhe, re pholosiwa ka kutlwelo-botlhoko, ka tumelo mo go Keresete, e seng ka sepe sa rona. Le jone boipolelo jo, ke neo ya Modimo Mowa o o Boitshepo ka fa Morena a solofeditseng ka teng fa a re, *“gonne ga e ne e nna lona ba lo buang, ke Mowa wa ga Rraeno o o buang ka lona”*(Matt.10:20).

A re tsweleleng mo go jona, gonne bo na le tsholofetso e ntle ya gore Morena le ene ga a kitla a re itatola fa pele ga Rara. Kana o supile jalo, fa a ne a sa re itatole fa pele ga basekisi le masole, a didimala fa pele ga bakokotedi ba gagwe. Yo Morena ke wa nnete! O tla re bolokela Lefoko, thero le disakaramente. A re di diriseng, gonne ke tsona tse a batlang go aga kereke ya gagwe ka tsone. Re amogeleng katlholo le katlholelo, re kope gore a re falodise kotsing, le go re gorosa kwa boikhutsong, go kwalwe mo majweng a mabitla a rona ka ga tumelo, tsholofelo le boipolelo tse re tshetseng ka tsone ka bopolotlhomogi jwa Modimo. Amen.

9. Thapelo: Morena re lebogela tsholofetso e kgolo ya gore dikgoro tsa felo ga baswi ga di kitla di metsa Kereke ya gago. Re kopa go newa rotlhe bopelokgale jwa baporofeti le baapostolo, le tlhaloganyo ya bone go farologanya boammaruri le tshokamo. Boloka Kereke ya bokeresete lefatsheng lotlhe mo

nneteng ya bontšhwafatso gore baleofi ba utlwe sentle mpho e o ba e rometseng ba amogedisiwe tsholofelo ya digakolodi tsa bone, e bong boitshwarelo jwa dibe ka Keresete. Amen. Thapelo ya Morena: Rara wa rona yo o mo legodimong ...

10. Sefela sa 246 - 227/235.

Tshegofatso: Kagiso ya Morena Jesu Keresete, lorato lwa Modimo Rara, matshediso le kgomotso tsa Mowa o o Boitshepo, di nne le rona. Amen.

Thero eno e kwadilwe ke D. P. Tswaedi, ka ngwaga wa 1999; 2005.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.